

21 OCT 2003

Buku-Hilang (Bergambar)/I

MENARA BUKU TERTINGGI MALAYSIA LESAP

PUTRAJAYA, 21 Okt (Bernama) -- Kira-kira 2,000 naskah buku yang digunakan bagi membina menara buku tertinggi Malaysia yang dipamer di Pusat Konvensyen Putrajaya (PCC) sempena Sidang Kemuncak Pertubuhan Persidangan Islam (OIC) ke-10 minggu lepas, dilaporkan hilang.

Penganjurnya, Billi Lim berkata hampir semua buku yang digunakan bagi membina replika Menara Kembar Petronas itu telah lesap.

"Hanya senaskah buku berbahasa China yang ditinggalkan...saya telah membuat laporan polis...kejadian ini mengejutkan," katanya kepada pemberita di sini.

Menara setinggi 20 meter itu dibina pada Julai lepas sebagai tanda terima kasih kepada Perdana Menteri Datuk Seri Dr Mahathir Mohamad dan diiktiraf oleh Malaysia Book of Records sebagai menara buku tertinggi di Malaysia.

Sejak dipamerkan buat kali pertama di Sunway Pyramid, menara itu telah dipasang di Lapangan Terbang KL (KLIA) sebelum dipindahkan ke lobi PCC.

Billi berkata nilai buku-buku yang hilang itu adalah kira-kira RM70,000.

Buku-buku yang dipamerkan termasuk buku yang ditulis Perdana Menteri serta penulis-penulis Malaysia yang ternama.

Menurut Billi, menara itu sepatutnya dipindahkan ke KL Sentral minggu depan.

Malahan, rancangan juga telah dibuat untuk mempamer menara itu di seluruh negara, katanya.

Beliau berharap sesiapa yang mungkin tersilap mengambil buku-buku itu agar dapat memulangkannya kepada Hardknocks Factory Sdn Bhd, USJ 13/3, Subang Jaya, 47630 Petaling Jaya.

-- BERNAMA

RIZ SRI MOZ